

# D'Aufblattler Tanzherrn Rud

Rudenkirtag Sierning Faschingdienstag am 5.3.2019



<p>Griaß eich Gott liabe Leit, is wieda Aufblattler-Zeit! In Grünburg schrein alle hurra, mia hobm an neichn Notar, und a fia uns is des a Traum, weil ma so an neichn Sponsor habm, drum singt fia eich mit neiem Mut, D'Notariats - Aufblattler Rud!</p>	<p>Es is seit Jahren ja scho gwiss, Das Neikircha Ruden-Hauptstadt is, Des hert a länger nu net auf, Hebn d'vierte Rud heit aus der Tauf, D'neikirchna Buam, so wie mas kennt, Ham scheints a echtes Gsangstalent, So a Talent kann ma net kaufen, In Siang, da kinnans dafür hoid saufen.</p>
<p>Liabe Leut', wirkli wahr: Papa is word'n im Neichen Jahr da oide Vize-Kanzler Strache. Uns verschlagt's komplett die Sprache! Es g'freut si a da Kanzler Kurz schau auf den ersten Baby-Furz und schenkt da Kindsmuatta Philippa a große Windel-Fuhr' van BIPA.</p>	<p>Um an „Batz'n“ mehr Gehalt kriag'n olle Buagamoastan bald, des hod am Gemeindetag unser Landeshauptmann g'sagt. Und seitdem fragt si ganz Siag'n: Wird da Kalchmair a mehr kriag'n, weil ma is si net ganz klar, wos bis jetzt sei' „Leistung“ war.</p>
<p>Da Forsthof Wirt, der junge Mann! Is 50ig worn, man glaubt es kaum! Er is a bekannter Mann in Sierng, drum möcht ma heute gratulieren! Als Geschenk du siachst das eh, dei Haus is voi, es rennt der Schmee! Wir bitten di, dua uns schee, sollst heut amoi NED knausrig sei!</p>	<p>Hearts, da Mittendorfer Pold bringt d' Frau zan Arzt, hätt's wieda g'holt, gehd draußt a weng spaziern ganz schleini und schaut ins Friedhofs-Klo gach eini. Grod wia er „am Häusl“ wo sperr'n s' auf d' Nacht de „Lucka“ zua. Dawäu is d' Frau, so hert ma red'n, schau ganz schee „aus'n Häusl“ gwen</p>
<p>Landesrat Max Hiegelsberger is a schau a paar Jahr' am „werka“. Er is' der, dem de Bau'n, fost bedingungslos vertrau'n. Va de Landesräte is' er in punkto Schönheit g'wiss, da olla Fescha va de „Manda“ - ganz knapp hinter da „Haberlander“</p>	<p>D' Steyrer Bezirkshauptmannschaft hod a neuchi Führungs-Kraft. Damit's nur jo a Jeda woäß: Breitwieser Carmen hoäßt s'. Ihr Vorgängerin is' mit „Ho-ruck“ in die Landeshauptstadt z'ruck. Jetzt geht d' „Altreiter-Windsteiger“ denan in Linz auf'n „Zeiger“</p>
<p>Da Böhmdorfer Franz wird 70 Jahr alt und hod vier Schüsseln Knödeln zahlt. Doss des „g'mischte“ war'n hod g'wusst natürli a da Finkl Gust. Er g'lengt in d' Schüssel ganz dergiert, ob's wos mit an Grammelknödel wird. Er hod kan Grammel net dawischt, dafia acht falsche „aussa“ g'fischt!</p>	<p>Adlwang hat a mords drum Freud, und für Bad Hall do duads uns leid! So steht des Holzhaus mit der Kammer, in Adlwang, -a so a jammer! Da Wenzl Adi, der kassiert, denn er hod schau längst kapiert, es lassen im Großen und im Ganzen de Leut' si immer wieder „pflanzen“!</p>

In zwa drei Wochen is soweit,  
dann wirds fian Brexit Wirklichkeit,  
doch so leicht is net de Gschicht,  
de oan woin weg, de andern nicht,  
de Streiterei de is zum Speibn,  
uns kinnan d'Briten gstein bleibn,  
Wanns net amoi des Aussteing schoffen,  
de blasierten Insel-Affen!

Jo es is hoid wirklich bitter,  
so manches Haar, des wird jetzt schütter,  
A beim Gehn da merkt ma hoid,  
ma wird jetzt a sche langsam oid,  
seit 15 Jahr scho da dabei,  
Doch leider is hoit einerlei,  
denn ihr brauchts uns da in Siagn,  
Wei mia den Altersschnitt halbiern!